

四庫全書

集部

欽定四庫全書

古樂苑卷三十三

明 梅鼎祚 編

襍曲歌辭

漢並無名氏

蜨蝶行

古辭

蜨蝶之遨遊東園奈何卒逢三月養子燕接我首宿間  
持之我入紫深宮中行纏之傳樽櫨間雀來燕燕子見  
銜哺來搖頭鼓翼何軒奴軒持一作披

同前

梁李鏡遠

青春已布澤微蟲應節歡朝出南園裏暮依華葉端  
菱舟追或易風池渡更難羣飛終不遠還向玉階蘭

春一作年

驅車上東門行

此與冉冉孤生竹並漢十九首中詩

古辭

驅車上東門遙望郭北墓白楊何蕭蕭松柏夾廣路  
下有陳死人杳杳即長暮潛寐黃泉下千載永不寤  
浩浩陰陽移年命如朝露人生忽如寄壽無金石固萬歲更

相送賢聖莫能度服食求神仙多為藥所誤不如飲美酒被服紉與素

駕言出北闕行

藝文題云驅車上東門則此擬作

晉陸機

駕言出北闕躑躅遵山陵長松何鬱鬱丘墓互相承念昔殂沒子悠悠不可勝安寢重冥廬天壤莫能興人生何所促忽如朝露凝辛苦百年間戚戚如履冰仁知亦何補遷化有明徵求仙鮮克仙太虛安可凌良會罄美

服對酒宴同聲

安可凌一作不可凌

傷歌行

傷歌行側調曲也古辭傷日月代謝年命道盡絕離知友傷而作歌也玉臺作

魏明帝

古辭

昭昭素明月輝光燭我牀  
憂人不能寐耿耿夜何長  
微風吹闐闐羅帷自飄揚  
攬衣曳長帶展履下高堂  
東西安所之徘徊以彷徨  
春鳥翻南飛翩翩獨翱翔  
悲聲命儔匹哀鳴傷我腸  
感物懷所思泣涕忽霑裳  
佇立吐高

吟舒憤訴穹蒼

翻一作向

悲歌

古辭

悲歌可以當泣遠望可以當歸思念故鄉鬱鬱累累欲歸家無人欲渡河無船心思不能言腸中車輪轉

前緩聲歌

按緩聲本為歌聲之緩非言命也陸機前緩聲歌言將前慕仙遊冀命長緩謝惠連後緩聲歌大畧戒居高位而為讒諂所蔽與前歌異

古辭

水中之馬必有陸地之船但有意氣不能自前心非木石荆根株數得覆蓋天當復思東流之水必有西上之

魚不在大小但有朝於復來長笛續短笛欲今皇帝陛下三千萬

同前

晉陸機

遊仙聚靈族高會曾城阿長風萬里舉慶雲鬱嵯峨宓妃興洛浦王韓起太華北徵瑤臺女南要湘川娥肅肅霄駕動翩翩翠蓋羅羽旗棲瓊鸞玉衡吐鳴和太容揮高弦洪崖發清歌獻酬既已周輕舉乘紫霞總轡扶桑枝濯足暘谷波清輝溢天門垂慶惠皇家

枝一作底

同前

宋孔寧子

供帳設玄宮  
衆仙胥旅亞  
炤炤二儀曠  
雍容風雲暇  
北伐太行鼓  
南整九疑駕  
笙歌興洛川  
鳴簫起秦榭  
鈞天異三代  
廣樂非韶夏  
滿堂皆人靈  
列筵必羽化  
烏可徧日留  
兔自延月夜  
弱水時一濯  
扶桑聊暫舍  
兆旬方履端  
千齡配八蜡

同前

梁沈約

羽人廣宵宴  
帳集瑤池東  
開霞汎綵靄  
澄霧迎香風  
龍



駕出黃苑帝服起河宮九疑輔煙雨三山馭螭鴻玉鑾  
乃排月瑤輶信凌空神行燭玄漢帝旆委曾虹簫歌美  
羸女笙吹悅姬童瓊漿且未洽羽轡已騰空息鳳曾城  
曲滅景清都中隆祐集皇代委祚溢華嵩

後緩聲歌

一作前  
緩聲歌

羲和織阿去嵯峨覩物知使命余轉欲悲歌憂戚人心  
胷處山勿居峰在行勿為公居峰太阻銳為公過讒蔽  
邪琴自踈越雅韻能揚揚滑滑相混同終始福祿豐

緩歌行

宋謝靈運

飛客結靈友，凌空萃丹丘。  
習習和風起，采采彤雲浮。  
娥皇發湘浦，明出河洲。  
宛宛連螭轡，裔裔振龍旒。

浮一作流

旒一作翰  
此首闕

枯魚過河泣

古辭

枯魚過河泣，何時悔復及。  
作書與魴鱖，相教慎出入。

古咄咄歌

潘安仁笙賦曰：詠園桃之夭夭，歌棗下之纂纂。歌曰：棗下纂纂，朱實離離。

宛其死矣，化為枯枝。纂纂棗花也，棗之纂纂，盛貌。實之離離，將衰言榮謝之各有時也。棗

下何纂

纂出此

古辭

棗下何纂纂榮華各有時棗欲初赤時人從四邊來棗

適今日賜誰當仰視之

闕誤

棗下何纂纂

梁簡文帝

垂花臨碧澗結翠依丹巘非直入遊宮兼期植靈苑落  
日芳春暮遊人歌吹晚弱刺引羅衣朱實凌還幘且歡  
洛浦詞無羨安期遠

同前

二首

隋王胄

柳黃知節變  
艸綠識春歸  
復道含雲影  
重簷照日輝  
御柳長條翠  
宮槐細葉開  
還得聞春曲  
便逐鳥聲來

古八變歌

選詩拾遺云古歌有八變九曲之名未詳其義

古辭

下同

北風初秋至  
吹我章華臺  
浮雲多暮色  
似從崦嵫來  
枯桑鳴中林  
絡緯響空堦  
翩翩飛蓬征  
愴愴遊子懷  
故鄉不可見  
長望始此回

豔歌

又謂之妍歌辭曰妍歌展妙聲發曲吐令辭又汎汎江漢萍飄蕩永無根又庭中有

奇樹上有悲鳴蟬又青青陵中草傾葉晞朝  
日陽春被惠澤枝葉可纔結皆妍歌之遺句

今日樂上樂相從步雲衢天公出美酒河伯出鯉魚青  
龍前鋪席白虎持盃壺南叶工鼓瑟北叶吹笙竽姮娥  
垂明璫織女奉瑛琚蒼霞揚東謳清風流西歛垂露成  
帷幄奔星扶輪輿

樂府

行胡從何方列國持何來翟翟翟五木香迷迭艾納

及都梁

五木御覽  
作五味

古樂府

蘭草自然香生於大道傷腰鎌八九月俱在束薪中

襍歌

一作離歌

晨行梓道中梓葉相切磨與君別交中繡如新縑維裂  
之有餘絲吐之無還期

維一作羅

古歌

上金殿著玉樽延貴客入金門入金門上金堂東廚具  
肴膳推牛烹猪羊主人前進酒彈瑟為清商投壺對彈

綦博奕並復行朱火颺煙霧博山吐微香清樽發朱顏  
四座樂且康今日樂相樂延年壽千霜

古歌

秋風蕭蕭愁殺人出亦愁入亦愁座中何人誰不懷憂  
令我白頭故地多颺風樹木何脩脩離家日趨送衣帶  
日趨緩心思不能言腸中車輪轉

古歌

太平御覽終久  
作嫌慘焉作安

高田種小麥終久不成穗男兒在他鄉焉得不憔悴

古歌銅雀辭

太平御覽作  
魏文帝歌

長安城西雙員闕上有一雙銅雀宿一鳴五穀生再鳴

五穀熟

文選注所  
引遺宿字

古絕句

四首

藁砧今何在山上復有山何當大刀頭破鏡飛上天

藁砧

砧也謂夫也山上有山出也大刀  
頭刀上環也破鏡言半月當還也

日暮秋雲陰江水清且深何用通音信蓮花玳瑁簪  
菟絲從長風根莖無斷絕無情尚不離有情安可別



南山一樹桂上有雙鴛鴦千年長交頸歡慶不相忘

古五襍組詩

古辭

五襍組岡頭草往復還車馬道不獲已人將老

同前

齊王融

五襍組慶雲發往復還經天月不獲已生胡越

同前

梁范雲

五襍組會塗山往復還兩峭關不得已嬬與鰥

古兩頭織織詩

古辭

下同

兩頭纖纖月初生半白半黑晴中晴  
膈膈膊膊雞初鳴  
磊磊落落向曙星

同前

兩頭纖纖青玉玦半白半黑頭上髮  
膈膈膊膊春冰裂  
磊磊落落桃初結

同前

齊王融

兩頭纖纖綺上紋半白半黑鷦鷯  
膈膈膊膊烏迷星  
磊磊落落玉石分



古樂苑卷三十三

欽定四庫全書

集部

古樂苑卷三十四

詳校官編修<sub>臣</sub>李堯棟

主事銜<sub>臣</sub>徐以坤覆勘

總校官降調編修<sub>臣</sub>倉聖脉

校對官主事<sub>臣</sub>陳文樞

謄錄監生<sub>臣</sub>衛子忠

欽定四庫全書

古樂苑卷三十四

明 梅鼎祚 編

襍曲歌辭

魏吳

劉勳妻

藝文云代劉勳妻王氏襍詩二首玉臺作王宋自作通志佳麗四十七曲有劉

勳妻王宋者平虜將軍劉勳妻也入門三十餘年後勳悅山陽司馬氏女以宋無子出之

還于道中作詩一首

魏文帝

翩翩牀前帳張以蔽光輝昔將爾同去今將爾同歸絨

藏篋笥裏當復何時披

張一作可

誰言去婦薄去婦情更重千里不唾井況乃昔所奉遠望未為遙踟躕不得並

種瓜篇

一作春遊曲玉臺  
題云樂府郭本同

魏明帝

種瓜東井上冉冉自踰垣與君新為婚瓜葛相結連寄託不肖軀有如倚太山兔絲無根株蔓延自登緣萍藻託清流常恐身不全被蒙丘山惠賤妾執拳拳天日照知之想君亦俱然

堂上行

見太平御覽

魏明帝

武夫懷勇毅，勒馬於中原。干戈森若林，長劍奮無前。

闕

同前

按鮑照集題云：代堂上歌行。凡照樂府並有代字，蓋擬作也。則此多為擬魏明帝矣。

宋鮑照

四座且莫喧，聽我堂上歌。昔仕京洛時，高門臨長河。出入重宮裏，結友曹與何。車馬相馳逐，賓朋好容華。陽春孟春月，朝光散流霞。輕步逐芳風，言笑弄丹葩。暉朱顏，醅紛紛。織女綏滿堂，皆美人。目成對湘娥，雖謝侍君。

閑明粧帶綺羅箏笛更彈吹高唱好相和萬曲不關情

一曲動情多欲知情厚薄更聽此聲過

莫一作勿情一作心

齊瑟行

歌錄曰名都美女白馬並齊瑟行也曹植名都篇曰名都多妖女美女篇曰美女妖

且閑白馬篇曰白馬飾金羈皆以首句名篇猶豔歌羅敷行有日出東西隅篇豫章行有鴛鴦

篇是也

名都篇

名都者邯鄲臨淄之類也以刺時人駢射之妙游騁之樂而無憂國之心也按

陳褚玠關雎東郊道出此

魏陳思王植

名都多妖女京洛出少年寶釵直千金被服光且鮮鬪



雞東郊道走馬長楸間馳騁未能半雙兔過我前攬弓  
捷鳴鏑長驅上南山左挽因右發一縱兩禽連餘巧未  
及展仰手接飛鳶觀者咸稱善衆工歸我妍歸來宴平  
樂美酒斗十千膾鯁膈胎鰕炮鼈炙熊蹯鳴傳嘯匹旅  
列坐竟長筵連翩擊掬攘巧捷惟萬端白日西南馳光  
景不可攀雲散還城邑清晨復來還

光一作麗東郊一作長安長驅上南

山一作驅上彼南山巧一作功

# 關雞東郊道

陳褚玠

春郊鬪雞侶捧敵兩逢迎妬羣排袖出帶勇向場驚錦  
毛侵距散芥羽襟塵生還同戰勝罷耿介寄前鳴一作羣

羣  
詭

美女篇

美女者以喻君子有美行願得明君而事之若不遇時雖見徵求終不屈也

魏陳思王植

美女妖且閒採桑岐路間柔條紛冉冉葉落何翩翩攘  
袖見素手皓腕約金環頭上金爵釵腰佩翠琅玕明珠  
交玉體珊瑚間木難羅衣何飄颻輕裾隨風還顧眄遺

光采長嘯氣若蘭行徒用息駕休者以忘餐借問女安居乃在城南端青樓臨大路高門結重闕容華耀朝日誰不希令顏媒氏何所營玉帛不時安佳人慕高義求賢良獨難衆人徒嗷嗷安知彼所觀盛年處房室中夜起長歎

飄颻一作飄飄安居一作何居

同前

晉傳玄

美人一何麗顏若芙蓉花一顧亂人國再顧亂人家未

亂猶可奈何

闕誤

同前

梁簡文帝

佳麗盡闌情風流最有名  
約黃能効月裁金巧作星  
粉光勝玉靚衫薄擬蟬輕  
蜜態隨流臉嬌歌逐軟聲  
朱顏半已醉微笑隱香屏

同前

蕭子顯

邯鄲暫停舞巴姬請罷弦  
佳人淇洧出豔趙復傾燕  
繁穠既為李照水亦成蓮  
朝酤成都酒暝數河間錢  
餘光幸許借蘭膏空自煎

邯鄲一作章丹

同前 二首

北齊魏收

楚襄遊夢去陳思朝洛歸參差結旌旆掩靄對驂騑  
變化看臺曲駭散屬川沂仍令我神女俄聞要虔妃  
照梁何足豔昇霞反奮飛可言不可見言是復言非

句闕

我帝更朝衣擅寵無論賤入愛不嫌微智  
瓊非俗物羅敷本自稀居然陋西子定可比南威  
新吳何為誤舊鄭果難依甘言誠易污得失定因機  
無憎藥英妬心賞易侵違

同前

隋盧思道

京洛多妖豔，餘香愛物華。  
俱臨鄧渠水，共採鄴園花。  
時搖五明扇，聊駐七香車。  
情踈看笑淺，嬌深盼欲邪。  
微津染長黛，新溜濕輕紗。  
莫言人未解，隨君獨問家。

鄧渠一作梁塏

白馬篇

白馬者見乘白馬而為此曲言人當及時立事盡力為國不可貪私也

魏陳思王植

白馬飾金羈，連翩西北馳。  
借問誰家子，幽并遊俠兒。  
少小去鄉邑，揚聲沙漠垂。  
宿昔秉良弓楛矢，何參差控弦。

破左的右發摧月支仰手接飛猱俯身散馬蹄狡捷過  
猿猴勇剽若豹螭邊城多警急胡虜數遷移羽檄從北  
來厲馬登高堤長驅蹈匈奴左顧陵鮮卑寄身鋒刃端  
性命安可懷父母且不顧何言子與妻名編壯士籍不  
得中顧私捐軀赴國難視死忽如歸

聲一作名胡虜一作虜騎編一作在

寄一作棄

同前

宋袁淑

劔騎何翩翩長安五陵間秦地天下樞八方轅才賢荆

魏多壯士宛洛富少年意氣深自負肯事郡邑權籍籍  
闕外來車徒傾國鄺五侯競書幣羣公亟為言義分明  
於霜信行直如弦交歡池陽下留宴汾陰塽一朝許人  
諾何能坐相捐影節去函谷投佩出甘泉嗟此務遠圖  
心為四海懸但營身意遂豈校耳目前俠烈良有聞古  
來共知然負一作許

同前

鮑照

白馬騂角弓鳴鞭東北風要途問邊急襍虜入雲中閉



壁自往夏清野徑還冬僑裝多闕絕旅服少裁縫埋身  
守漢境沈命對胡封薄暮塞雲起飛沙被遠松含悲望  
兩都楚歌登四墉丈夫設計誤懷恨逐邊戎棄別中國  
愛要冀胡馬功去來今何道卑賤生所鍾但令塞上兒  
知我獨為雄

境一作節  
棄一作罷

同前

齊孔稚圭

驥子跼且鳴鐵陣與雲平漢家嫖姚將馳突匈奴庭少  
年鬪猛氣怒髮為君征雄戟摩白日長劒斷流星早出

飛狐塞晚泊樓煩城虜騎四山合胡塵千里驚嘶笳振  
地響吹角拂天聲左碎呼韓陣右破休屠兵橫行絕漠  
表飲馬瀚海清隴樹枯無色沙草不當青勒石燕然道  
凱歌長安亭縣官知我健四海誰不傾但使強胡滅何  
須甲第成當令丈夫志獨為上古英

清一作訂

同前

梁沈約

白馬紫金鞍停鑣過上蘭寄言狹斜子詎知隴道難赤  
坂途三折龍堆路九盤氷生肌裏冷風起骨中寒功名

志所急日暮不遑餐長驅入右地輕舉出樓蘭直去已  
垂涕寧可望長安匪期定遠封無羨輕車官唯見恩義  
重豈覺衣裳單本持軀命答幸遇聲名完

同前

王僧孺

千里生冀北玉韜黃金勒散蹄去無已搖頭意相得豪  
氣發西山雄風擅東國飛輶出秦隴長驅繞岷嶰承謨  
若有神稟美良不惑滯汨河水黃參差嶂雲黑安能對  
兒女垂帷弄毫墨兼弱不稱雄後得方為特此心亦何

已君恩良未塞不許跨天山何由報皇德

同前

徐悱

研蹄飾鏤鞍飛鞚度河干少年本上郡遨遊入露寒劔  
琢荆山玉彈把隋珠丸聞有邊烽急飛候至長安然諾  
竊自許捐軀諒不難占兵出細柳轉戰向樓蘭雄名盛  
李霍壯氣勇彭韓能令石飲羽復使髮衝冠要功非汗  
馬報効乃鋒端日沒塞雲起風悲胡地寒西征馘小月  
北去腦烏丸歸報明天子燕然今復刊

今一作石

同前

大苑英華作煬帝樂府作孔稚圭詩紀云按詩中多叙征遠之事當以英華為正稚

圭別有

一篇

隋煬帝

白馬金具裝橫行遼水傍問是誰家子宿衛羽林郎文  
犀六屬鎧寶劍七星光山虛弓響徹地迴角聲長宛河  
推勇氣隴蜀擅威彊輪臺受降虜高闕翦名王射熊入  
飛觀校獵下長楊英名欺衛霍智策茂平良島夷時失  
禮卉服犯邊疆徵兵集薊北輕騎出漁陽集軍隨日暈  
挑戰逐星芒陣移龍勢動管開虎翼張衝冠入死地攘

臂越金湯塵飛戰鼓急風交征旆揚轉關平華地追奔  
掃帶方本持身許國沉復武功彰會令千載後流譽滿

旂常

具一作具  
集一作離

同前

王胄

白馬黃金鞍蹀躞柳城前問此何鄉客長安惡少年結  
髮從戎事馳名振朔邊良弓控繁弱利劍揮龍泉披林  
扼雕虎仰手接飛鳶前年破沙漠昔歲取祁連折衝推  
右校舉旗殪左賢虎彌還謝力慶忘本推懷海外平遐

險來庭識負寒三韓勞薄伐六事指幽燕良家選河右  
猛將征西山浮雲屯羽騎蔽日引長旃自矜有餘勇應  
募忽爭先王師已得僞夷首失求全鼓行徇玉檢衆勝  
蕩朝鮮志勇期功立寧憚微軀捐不羨山河賞唯希竹  
素傳

一作鞭泉一作淵虎彌  
一作昆彌失求一作諒失

同前

辛德源

任俠重芳辰相從兢逐春金羈絡赭汗紫纓應紅塵寶  
劍提三尺雕弓韜六鈞鳴珂蹕細柳飛蓋出宜春遙見

浮光發懸知上頭人

紫樓應紅塵一作紫陌映紅塵提一作橫光一作雲

當牆欲高行

魏陳思王植

龍欲升天須浮雲人之仕進待中人衆口可以鑠金讒  
言三至慈母不親憤憤俗間不辨僞真願欲披心自說  
陳君門以九重道遠河無津

當欲遊南山行

魏陳思王植

東海廣且深由卑下百川五嶽雖高大不逆垢與塵良  
木不十圍洪條無所因長者能博愛天下寄其身大匠



無弃材船車用不均錐刀各異能何所獨却前嘉善而  
矜愚大聖亦同然仁者各壽考四坐咸萬年

當事君行

魏陳思王植

人生有所貴尚出門各異情朱紫更相奪色雅鄭異音  
聲好惡隨所愛憎追舉逐虛名百心可事一君巧詐寧

拙誠

虛一作聲

當車已駕行

魏陳思王植

歡坐玉殿會諸貴客侍者行觴主人離席顧視東西廂

絲竹與鞞鐸不醉無歸來明燈以繼夕

桂之樹行

魏陳思王植

桂之樹桂之樹桂生一何麗佳揚朱華而翠葉流芳布  
天涯上有棲鸞下有盤螭桂之樹得道之真人咸來會  
講仙教而服食日精要道甚省不煩澹泊無為自然乘  
蹻萬里之外去留隨意所欲存高高上際於衆外下下  
乃窮極地天

苦思行

魏陳思王植

綠蘿緣玉樹光耀采相暉下有兩真人舉翅翻高飛我  
心何踴躍思欲攀雲追鬱鬱西岳顛石室青蔥與天連  
中有耆年一隱士鬚髮皆皓然策杖從吾遊教我忘  
言

升天行

二首樂府解題曰曹植又有上仙錄與  
神遊五遊龍欲升天等篇皆傷人世不  
永俗情險艱當求神仙翱翔六合之外  
與飛龍仙人遠遊篇前緩聲歌同意

魏陳思王植

乘蹻追術士遠之蓬萊山靈液飛素波蘭桂上參天玄

豹遊其下翔鷗戲其顛乘風忽登舉彷彿見衆仙

佛一作隍

扶桑之所出乃在朝陽谿中心陵蒼昊布葉蓋天涯日出登東幹旣夕沒西枝願得紆陽轡迴日使東馳

同前

宋鮑照

家世宅闕輔勝帶宦王城備聞十帝事委曲兩都情倦見物興衰驟覩俗屯平翩翩類迴掌恍惚似朝榮窮塗悔討短晚志愛長生從師入遠岳結友事仙靈五芝發金記九篇隱丹經風餐委松宿雲卧恣天行冠霞登綵

閣解玉飲椒庭，蹔遊越萬里。近別數千齡，鳳臺無還駕。  
簫管有遺聲，何當與爾曹。咏腐共舐腥。

翩翩一作翩翩  
愛一作重芝一

作圖飲一作隱近  
一作少當一作時

### 同前

梁劉孝勝

堯攀已徒說，湯捫亦妄陳。欲訪青雲侶，正遇丹丘人。  
少翁俱仕漢，韓終苦入秦。汾陰觀化鼎，瀛洲宴羽人。  
廣成參日月，方朔問星辰。驚祠伐楚樹，射藥戰江神。  
閭闔皆曾倚，太一豈難親。趙簡猶聞樂，周儲固上賓。  
秦皇多忌

害元朔少寬仁終無良有以非關德不鄰

同前

隋盧思道

尋師得道訣輕舉厭人羣玉山候王母珠庭謁老君煎  
為返魂藥刻作長生文飛策乘流電雕軒曳彩雲玄洲  
望不極赤野眺無垠金樓旦巖嵯玉樹曉氛氲擁琴遙  
可望吹笙遠詎聞不覺蜉蝣子死葬何紛紛

彩作白死  
葬作生死

同前

題云英才言聚  
賦得昇天行

釋慧靜

馭風過閬苑控鶴下瀛洲欲採三芝秀先從千仞遊駕

鳳吟虛管乘槎汎淺流顏齡一已駐方驗大椿秋

豔歌

魏陳思王植

出自薊北門遙望胡地桑枝枝自相值葉葉自相當

關

太平御覽作桑枝自相值桑葉自相當

出自薊北門行

曹植豔歌行出自薊北門遙望胡地桑枝枝自相值葉葉自相

當樂府解題曰出自薊北門行其致與從軍行同而兼言燕薊風物及突騎勇悍之狀若

鮑照羽檄起邊庭備叙征戰苦辛之意通典曰燕本秦上谷郡薊即漁陽郡皆在遼西漢

書曰薊故

燕國也

宋鮑照

羽檄起邊亭烽火入咸陽徵騎屯廣武分兵救朔方嚴  
秋筋竿勁虜陣精且彊天子按劍怒使者遙相望鴈行  
緣石徑魚貫度飛梁簫鼓流漢思旌甲被胡霜疾風衝  
塞起沙礫自飄揚馬毛縮如蝟角弓不可張時危見臣  
節世亂識忠良投軀報明主身死為國殤

騎一作師  
思當作颶

同前

陳徐陵

薊北聊長望黃昏心獨愁燕山對古刹代郡隱城樓屢  
戰橋恒斷長冰塹不流天雲如地陣漢月帶胡秋漬土



泥函谷接繩縛涼州平生燕領相會自得封侯

山一作然隱一

倚作

同前

周庾信

薊門還北望役役盡傷情關山連漢月隴水向秦城  
茹寒蘆葉脆弓凍紵弦鳴梅林能止渴復姓可防兵  
將軍朝挑戰都護夜巡營燕山猶有石須勒幾人名

朝挑一作連轉

苦熱行

魏陳思王植

行遊到日南經歷交趾鄉苦熱但暴露越夷水中藏

闕

同前

曹植苦熱行行遊到日南經歷交趾鄉苦熱但暴露越夷水中藏樂府解題曰苦熱

行備言流金燂石火山炎海之艱難也若鮑照赤坂橫西阻火山赫南威言南方瘴癘之

地盡節征伐而賞之而太薄也

宋鮑照

赤坂橫西阻火山赫南威身熱頭且痛鳥墮魂來歸湯

泉發雲潭焦煙起石礮日月有恒昏雨露未嘗晞丹虵

踰百尺玄蜂盈十圍含沙射流影吹蠱痛行暉瘴氣晝

熏體茵露夜霑衣饑猿莫下食晨禽不敢飛毒涇尚多

死渡瀘寧具腓生軀蹈死地昌志登禍機戈船榮既薄

伏波賞亦微爵輕君尚惜士重安可希

吹蠹一作吹鼓  
誤痛一作病登

一作  
高

同前

梁簡文帝

六龍驚不息三伏啓炎陽寢興煩几案俯仰倦幃牀滂  
沲汗似鑠微靡風如湯洄池愧玉浪蘭殿非含霜細簾  
時半卷輕幌乍橫張雲斜花影沒日落荷心香願見洪  
崖井詎憐河朔觴

同前

題云苦熱此與下姑從郭本  
按傳玄亦有苦熱詩原未錄

任昉

旭旦煙雲卷烈景入東軒  
傾光望轉蕙斜日照西垣  
旣卷焦梧葉復傾葵藿根  
重簾無冷氣挾石似懷溫  
霖霖類珠綴喘嚇狀雷奔

同前

題云  
苦熱

何遜

昔聞草木焦今覩沙石爛  
噓噓風愈靜曛曛日漸旰  
習靜閱衣巾讀書煩几案  
卧思清露浥坐待明星燦  
蝙蝠戶間飛蟻蠓牕中亂  
會無河朔飲室有臨淄汗  
遺金自

不拾惡木寧無幹願以三伏晨催促九秋換

觀一作窺  
閨一作問

同前

題云和樂儀同  
苦熱姑從郭本

周庾信

火井沈熒散炎洲高燄通鞭石未成雨鳴鳶不起風思  
為鸞翼扇願備明光宮臨淄迎子禮中散就安豐美酒  
含蘭氣甘瓜開蜜筒寂寥人事屏還得隱牆東

妾薄命

二首樂府解題曰妾薄命曹植云日月  
既逝西藏蓋恨燕私之歡不久梁簡文

帝名都多麗質傷良人不  
返王嬙遠聘盧姬嫁遲也

魏陳思王植

攜玉手喜同車北上雲閣飛除釣臺蹇產清虛池塘觀

沼可娛仰汎龍舟綠波俯握神草枝柯想彼宓妃洛河

退詠漢女湘娥

觀一作靈

日月既逝西藏更會蘭室洞房華燈步障舒光皎若日  
出扶桑促樽合坐行觴主人起舞逆盤能者冗觸別端  
騰觚飛爵闌干同量等色齊顏任意交屬所歡朱顏發  
外形蘭袖隨禮容極情妙舞仙仙體輕裳解履遺絕纓  
俛仰笑諠無呈覽持佳人玉顏齊舉金爵翠盤手形羅  
袖良難腕弱不勝珠環坐者歎息舒顏御巾衰粉君傷

中有霍納都梁雞舌五味襍香進者何人齊姜恩重愛  
深難忘召延親好宴私但歌杯來何遲客賦既醉言歸  
主人稱露未晞

日月既逝一作日既逝矣華燈步障舒  
光玉臺作花燭步障輝煌樽一作酒妙

一作屢裳解一作  
解裳舉玉臺作接

### 同前

名都多麗質本自恃容姿蕩子行未至秋胡無定期玉  
貌歇紅臉長嚙串翠眉奩鏡迷朝色縫鍼脆故絲本異  
搖舟咎何闕竊席疑生離誰拊背盜死詎來遲王嬙貌

本絕踉蹌入氍毹盧姬嫁日晚非復少年時轉山猶可  
遂烏白望難追妾心徒自苦傷人會見嗤

串一作慣  
迨一作期

同前

劉孝威

去年從越障今歲歿胡庭嚴霜封碣石驚沙暗井陘玉  
簪久落鬢羅衣長挂屏浴蠶思漆水條桑憶鄭垞寄書  
朝鮮吏留釧武安亭忽言戎夏隔但念心契冥不見豐  
城劍千祀復同形

同前

拾遺作  
孝威

劉孝勝



馮姜朝汲遠徐吾夜火窮舊井長逢幕鄰燈欲未通五  
逐無來聘三娶盡凶終離災陽祿觀就廢昭臺宮乘屯  
迹雖淑應戚理恒同復傳蘇國婦故愛在房櫬愁眉歇  
巧黛啼妝落豔紅織書凌竇錦敏誦軼繁弓離劒行當  
合春牀勿怨空

五遊

魏陳思王植

九州不足步願得凌雲翔逍遙八紘外遊目歷遐荒披  
我丹霞衣襲我素霓裳華蓋紛掩藹六龍仰天驤耀靈

未移景倏忽造昊蒼閭闔啓丹扉雙闕曜朱光徘徊文  
昌殿登陟太微堂上帝休西櫺羣后集東廂帶我瓊瑤  
佩漱我沆瀣漿踟躕玩靈芝徙倚弄華芳王子奉仙藥  
美門進竒方服食享遐紀延壽保無疆

遠遊篇

楚辭遠遊章曰悲時俗之迫阨兮願輕舉而遠遊質菲薄而無因兮焉託乘而

上浮王逸云遠遊者屈原之所作也屈原履方直之行不容於世因於讒佞無所告訴乃思與仙人俱遊戲周歷天地無所不至焉周王褒又有輕舉篇亦出於此按秦宓有遠遊一首言容子遠遊之意與此不同未錄

魏陳思王植

遠遊臨四海俯仰觀洪波大魚若曲陵承浪相經過靈  
鼈戴方丈神岳儼嵯峨仙人翔其隅玉女戲其阿瓊蕊  
可療飢仰漱吸雲霞崑崙本吾宅中州非我家將歸謁  
東父一舉超流沙鼓翼舞時風長嘯激清歌金石固易  
敝日月同光華齊年與天地萬象安足多

輕舉篇

周王褒

天地能長久神仙壽不窮白玉東華檢方諸西嶽重俄  
瞻少海北暫別扶桑東俯觀雲似蓋低望月如弓看棋

城邑改辭家墟巷空流珠餘舊竈種杏發新叢酒釀瀛洲玉劒鑄昆吾銅誰能攬六博還當訪井公

仙人篇

樂府廣題曰秦始皇三十六年使博士為仙人詩遊行天下令樂人歌之曹

植仙人篇曰仙人攬六博言人生如寄當養羽翼徘徊九天以從韓終王喬於天衢也陳陸瑜又有仙人攬六博著篇蓋出於此郭本以神仙篇附後今從之

魏陳思王植

仙人攬六博對博太山隅相娥拊琴瑟秦女吹笙等玉樽盈桂酒河伯獻神魚四海一何局九州安所如韓終

與王喬要我於天衢萬里不足步輕舉凌太虛飛騰踰  
景雲高風吹我軀迴駕觀紫微與帝合靈符閭闔正嵯  
峨雙闕萬丈餘玉樹扶道生白虎夾門樞驅風遊四海  
東過王母廬俯觀五嶽間人生如寄居潛光養羽翼進  
趨且徐徐不見昔軒轅乘龍出鼎湖徘徊九天下與爾  
長相須

東一作升

仙人覽六著篇

陳陸瑜

九仙會歡賞六著且娛神戲谷聞餘地銘山憶舊秦避

敵情思巧論兵勢重新問取南皮夕還笑拂棊人

神仙篇

題云遊仙詩應教本  
非樂府姑從郭本

齊王融

命駕瑤池側過息羸女臺長袖何靡靡簫管清且哀璧  
門涼月舉珠殿秋風迴青鳥驚高羽王母停玉杯舉手

暫為別十年將復來

側一作隈原共  
五首郭載其一

同前

梁戴暠

徒聞石為火未見坂停丸暫數盈虛月長隨晝夜瀾辭  
家試學道逢師得姓韓閭山金靜室蓬丘銀露壇安平

醞仙酒渤海轉神丹初飛喜退鳳新學法乘鸞十芒生  
月腦六畝起星肝流瓊播疑俗信玉類陽官玄都宴晚  
集紫府事朝看謝手今為別進憐此俗難

流一作飛

同前

英華又有億舜日一首  
樂府作沈約樂未央

陳張正見

瀛洲分渤海閭苑隔虹蜺欲識三山路須尋千仞溪石  
梁雲外立蓬丘霧裏迷年深毀丹竈學久棄青泥葛水  
留還杖天衢鳴去雞六龍驤首起雲閣萬里一別何寥  
廓玄都府內駕青牛紫蓋山中乘白鶴尋陽杏花終難

朽武陵桃花未曾落已見玉女笑投壺復覩仙童欣六  
博同甘玉文棗俱飲流霞藥鸞歌鳳舞集天台金闕銀  
宮相向開西王已令青鳥去東海還馭赤虬來魏武還  
車逢漢女荆王因夢識陽臺鳳蓋隨雲聊蔽日霓裳襍  
雨復乘雷神岳吹笙遙謝手當知福地有神才

同前  
題云  
神仙

北齊顏之推

紅顏恃容色青春矜盛年自言曉書劍不得學神仙風  
雲落時後歲月度人前鏡中不相識捫心徒自憐願得



金樓要思逢玉鈐篇九龍遊弱水八鳳出飛煙朝遊采  
瓊實夕宴酌膏泉崢嶸下無地列缺上陵天舉世聊一  
息中州安足旋

同前

隋盧思道

浮生厭危促名岳共招攜雲軒遊紫府風駟上丹梯時  
見遼東鶴屢聽淮南雞玉英持作寶瓊實採成蹊飛策  
揚輕電懸旌耀彩蜺瑞銀光似燭靈石髓如泥寥廓鸞  
山右超越鳳洲西一丸應五色持此救人迷

同前

魯范

王遠尋仙至藥已訪術迴乘空向紫府控鶴下蓬萊霜  
分白鹿駕日映流霞杯煎金丹未熟醒酒藥初開乍應  
觀海變誰肯畏年顏

昇仙篇

梁簡文帝

少室堪求道明光可學仙丹繒碧林宇綠玉黃金篇雲  
車了無轍風馬詎須鞭靈桃恒可餌幾迴三千年

飛龍篇

楚辭離騷曰為余駕飛龍兮裊瑤象以  
為車曹植飛龍篇亦言求仙者乘飛龍

而昇天與  
楚辭同意

魏陳思王植

晨遊泰山雲霧窈窕忽逢二童顏色鮮好乘彼白鹿手  
翳芝草我知真人長跪問道西登玉堂金樓復道授我  
仙藥神皇所造教我服食還精補腦壽同金石永世難

老

堂一  
作臺

鬪雞篇

春秋左氏傳曰季郇之雞鬪季氏介其  
雞郇氏為之金距杜預云擣芥子搗其

羽也或曰以膠沙搗之為介雞郇都故事曰  
魏明帝太和中作鬪雞臺趙王石虎亦以芥

羽漆砂鬪雞于此故曹植詩云  
鬪雞東郊道走馬長楸間是也

魏陳思王植

遊目極妙伎清聽厭宮商主人寂無為衆賓進樂方長  
筵坐戲客鬪雞觀閒房羣雄正翕赫雙翅自飛揚揮羽  
激清風悍目發朱光背落輕毛散嚴距往往傷長鳴入  
青雲扇翼獨翱翔願蒙狸膏助常得擅此場激一作邀  
悍一作博

同前

題云鬪雞植與應瑒  
疑並陳思王同時作

劉楨

丹雘被華采雙距如鋒芒願一揚炎威會戰此中唐利  
爪探玉除瞋目含火光長翹驚風起勁翮正敷張輕舉

奮勾喙電擊復還翔

同前

題云  
鬪雞

應場

戚戚懷不樂無以釋勞動兄弟遊戲場命駕迎衆賓二  
部分曹伍羣雞煥以陳雙距解長綵飛踊超敵倫芥羽  
張金距連戰何續紛從朝至日夕勝負尚未分專場駐  
衆敵剛捷逸等羣四坐同休贊賓主懷悅欣博奕非不  
樂此戲世所珍

同前

題云鬪雞姑從郭本徐陵  
庾信亦有鬪雞詩原未錄

梁簡文帝

歡樂良無已東郊春可遊百花非一色新田多異流龍  
尾橫津漢車箱起戍樓玉冠初警敵芥羽忽猜儔十日  
驕既滿九勝勢恒遒脫使田饒見堪能說魯侯

同前

劉孝威

丹雞翠翼張妬敵復專場翅中含芥粉距外耀金芒氣  
踰上黨烈名貴下韞良祭橋愁魏后食跡忌齊王願賜  
淮南藥一使雲間翔

盤石篇

魏陳思王植

盤盤山巔石飄飄澗底蓬我本太山人何為客海東萊  
葭彌斥土林木無分重圻巖若崩缺湖水何洶洶蚌蛤  
被濱涯光彩如錦虹高彼凌雲霄浮氣象蜃龍鯨脊若  
丘陵巔若山上松呼吸吞船櫓澎湃戲中鴻方舟尋高  
價珍寶麗以通一舉必千里乘颶舉帆幢經危履險阻  
未知命所鍾常恐沈黃壚下與鼃鼃同南極蒼梧野遊  
盼窮九江中夜指參辰欲師當定從仰天長太息思想  
懷故邦秉桴何所志吁嗟我孔公

海一作淮吁  
嗟一作嗟歎

驅車篇

魏陳思王植

驅車揮鷲馬東到奉高城神哉彼太山五嶽專其名隆  
高貫雲霓嵯峨出太清周流二六候間置十二亭上有  
涌醴泉玉石揚華英東北望吳野西眺觀日精魂神所  
繫屬逝者感斯征王者以歸天効厥元功成厯代無不  
遵禮祀有品程探策或長短唯德享利貞封者七十帝  
軒皇元獨靈餐霞漱沆瀣毛羽被身形發舉蹈虛廓徑  
廷升窈冥同壽東父年曠代永長生

揮一作揮  
祀一作記



種葛篇

魏陳思王植

種葛南山下，葛藟自成陰。與君初婚時，結髮思義深。歡  
愛在枕席，宿昔同衣衾。竊慕棠棣篇，好樂如瑟琴。行年  
將晚暮，佳人懷異心。恩紀曠不接，我情遂抑沈。出門當  
何顧，徘徊步北林。下有交頸獸，仰見雙棲禽。攀枝長歎  
息，淚下沾羅襟。良馬知我悲，延頸代我吟。昔為同池魚，  
今若商與參。往古皆歡遇，我獨困於今。棄置委天命，悠

悠安可任

若一作為

棄婦篇

本集不載見  
玉臺新詠

魏陳思王植

石榴植前庭綠葉搖縹青丹華灼烈烈璀璨彩有光榮光  
榮暄流離可以處淑靈有鳥飛來集拊翼以悲鳴悲鳴  
夫何為丹華實不成拊心長歎息無子當歸寧有子月  
經天無子若流星天月相終始流星沒無精棲遲失所  
宜下與瓦石并憂懷從中來歎息通雞鳴反側不能寐  
逍遙於前庭踟躕還入房肅肅帷幕聲寒帷更攝帶撫  
弦調鳴箏慷慨有餘音要妙悲且清收淚長歎息何以

負神靈招搖待霜露何必春夏成晚穫為良實願君且

安寧

庭靈鳴成寧五韻  
重用調一作彈

### 結客篇

魏陳思王植

結客少年場報怨洛北郎

闕

### 結客少年場行

曹植結客篇結客少年場報怨洛北郎樂府解題曰結客少年

場行言輕生重義慷慨以立功名也後漢書曰祭遵嘗為部吏所侵結客殺人廣題曰漢長安少年殺吏受財報仇相與探丸為彈探得赤丸所武吏探得黑丸殺文吏尹賞為長安令盡捕之長安中為之歌曰何處求子死桓東少年場生時諒不謹枯骨復何莫按結

客少年場言少年時結任俠之客為遊樂之場終而無成故作此曲也按齊梁間少年子

長安少年行疑並本此今亦附後

宋鮑照

驄馬金絡頭錦帶佩吳鉤失意杯酒間白刃起相讐追  
兵一旦至負劒遠行遊去鄉三十載復得還舊丘升高  
臨四塞表裏望皇州九衢平若水雙闕似雲浮扶宮羅  
將相夾道列王侯日中市朝滿車馬若川流擊鐘陳鼎  
食方駕自相求今我獨何為輾轉懷百憂

塞一作闕  
衢一作塗

同前

梁劉孝威

少年本六郡遨遊遍五都插腰銅匕首障日錦塗蘓  
鵲羽裝銀鋪犀膠飾象弧近發連雙兔高彎落九烏邊城  
多警急節使滿郊衢居延箭箠盡踈勒井泉枯正蒙都  
護接何由憚險途千金募惡少一麾擒骨都勇餘聊蹙  
鞠戰罷戲投壺昔為北方將今為南面孤邦君行負弩  
縣令且前驅

戲一作暫

同前

周庾信

結客少年場春風滿路香歌撩李都尉果擲潘河陽折

花迷勸酒就水更移牀今年喜夫婿新拜羽林郎定知  
劉碧玉偷嫁汝南王

同前

隋孔紹安

結客佩吳鉤橫行度隴頭鴈在弓前落雲從陣後浮吳  
師驚燧象燕將警犇牛轉蓬飛不息冰河結未流若使  
三邊定當封萬里侯

同前

虞世南

韓魏多奇節倜儻遺名利共矜然諾心各負縱橫志結

友一言重相思千里至綠沈明月弦金絡浮雲轡吹簫  
入吳市擊筑遊燕肆尋源博望侯結客遠相求少年重  
一顧長驅背隴頭蹙蹙霜戈動耿耿劒虹浮天山冬夏  
雪交河南北流雲起龍沙暗木落鴈行秋輕生狗知已  
非是為身謀

少年子

齊王融

聞有東方騎遙見上頭人待君送客返挂釵當自陳

同前

題云詠少年  
姑從郭本

梁吳均

董生能巧笑子都信美目百萬市一言千金買相逐不  
道參差菜誰論窈窕淑願言奉繡被來就越人宿

長安少年行

題云學古三首此第一  
首本非樂府姑從郭氏

梁何遜

長安美少年羽騎暮連翩玉羈瑪瑙勒金絡珊瑚鞭陣  
雲橫塞起赤日下城圓追兵待都護烽火望祁連虎落  
夜方寢魚麗曉復前平生不可定空信蒼浪天

同前

陳沈炯



長安好少年。驄馬鐵連錢。陳王裝腦勒。晉后鑄金鞭。步  
搖如飛鷺。寶劒似舒蓮。去來新市側。遨遊大道邊。道邊  
一老翁。顏鬢如衰蓬。自言居漢世。少小見豪雄。五侯俱  
拜爵。七貴各論功。建章通北闕。複道度南宮。太后居長  
樂。天子出回中。玉輦迎飛燕。金山賞鄧通。一朝復一日。  
忽見朝市空。扶桑無復海。崑山倒向東。少年何暇問。顏  
齡值福終。子孫冥滅盡。鄉閭復不同。淚盡眼方暗。脾傷  
耳自聾。杖策尋遺老。歌嘯詠悲翁。遭隨各有遇。非敢

訪童蒙

日中市朝滿

出鮑照前行

陳張正見

雲閣綺霞生  
旗亭麗日明  
塵飛三市路  
蓋入九重城  
竹

葉當壚  
滿桃花帶綬  
輕唯見爭名  
利安知大隱情

壚初學記

作杯

樂府

魏陳思王植

墨出青松煙  
筆出狡兔翰  
古人感鳥跡  
文字有改判

闕

樂府歌

魏陳思王植

膠漆至堅浸之則離皎皎素絲隨染色移君不我棄讒人所為

駕出北郭門行

魏阮瑀

駕出北郭門馬樊不肯馳下車步踟躕仰折枯楊枝顧聞丘林中嗷嗷有悲啼借問啼者出何為乃如斯親母舍我歿後母憎孤兒饑寒無衣食舉動鞭捶施骨消肌肉盡體若枯樹皮藏我空室中父還不能知上冢察故處存亡永別離親母何可見淚下聲正嘶棄我於此間

窮厄豈有貨傳告後代人以此為明規

作踟躕一

秦女休行

左延年辭大畧言女休為燕王婦為宗報讐殺人都市雖被囚繫終以赦

宥得寬刑戮也晉傳玄云龐氏有烈婦亦言殺人報怨以烈義稱與古辭義同而事異

魏左延年

步出上西門遙望秦氏廬秦氏有好女自名為女休休  
年十四五為宗行報讐左執白楊刀右據宛魯矛讐家  
便東南仆僵秦女休女休西上山上山四五里關吏呵  
問女休女休前置辭平生為燕王婦於今為詔獄囚平

生衣參差當今無領襦明知殺人當死兄言快快弟言  
無道憂女休堅辭為宗報讐言死不疑殺人都市中微我  
都巷西丞御羅東向坐女休悽悽曳拮前兩徒夾我持  
刀刀五尺餘刀未下腫臃擊鼓赦書下

廬太平御覽作  
樓右據宛魯矛

作右據宛景矛休年一作始年闕吏訶問女  
休作闕吏得女休置一作致離下一有列字

同前

此本詠龐氏婦而借秦女  
休為題一云秦氏有烈婦

晉傅玄

龐氏有烈婦義聲馳雍涼父母家有重怨仇人暴且彊  
雖有男兄弟志弱不能當烈女念此痛丹心為寸傷外

若無意者內潛思無方白日入都市怨家如平常匿劍  
藏白刃一奮尋身僵身首為之異處伏尸列肆旁肉與  
土合成泥灑血濺飛梁猛氣上干雲霓仇黨失守為披  
攘一市稱烈義觀者收淚並慨忼百男何當並不如一  
女良烈女直造縣門云父不幸遭禍殃今仇身以分裂  
雖死情並揚殺人當伏法義不苟活隳舊章縣令解印  
綬令我傷心不忍聽刑部垂頭塞耳令我吏舉不能成  
烈著希代之績義立無窮之名夫家同受其祚子子孫

孫咸享其榮今我作歌吟詠高風激揚壯發悲且清

祝衎歌

高士傳魏伐吳有竊問隱士焦先先不應謬歌後魏軍敗人推其意牂羊指吳

殺魏指魏也魏志後二句云本心為常殺牂羊更殺其殺魏邪

魏焦先

祝衎祝衎非魚非肉更相追逐本為殺牂羊更殺殺魏

采薪者歌

晉書曰籍嘗於蘇門山遇孫登與商畧終古及栖神道氣之術登皆不應

籍因長嘯而退至半嶺聞有聲若鸞鳳之音響乎巖谷乃登之嘯也遂歸著大人先生傳按傳云大人先生蓋老人也不知姓字先生過神宮而息漱吳泉而行迴乎迺而遊覽焉

見薪於阜者歎曰汝將焉以是終乎哉薪者曰是終我乎不以是終我乎且聖人無懷何其哀因歎而歌曰日沒云云先生聞之笑曰雖不及大庶免小矣乃歌曰天地云云按魏氏春秋曰阮籍少時遊蘇門山有隱者籍對之長嘯蘇門生莞爾而笑籍既降蘇門生亦嘯若鸞鳳之音籍乃服蘇門生之論作大人先生傳以寄所懷歌曰日沒云云又歌曰天地云云袁淑真隱傳曰蘇門先生嘗行見采薪于阜者先生歎曰汝將以是終乎袁哉薪者曰以是終者我也不以是終者我也因歌二章莫知所終則此二歌皆出採薪今依本傳

魏阮籍

日沒不周西月出丹淵中陽精蔽不見陰光代為雄亭



亭在須臾厭厭將復隆離合雲霧兮往來如飄風富貴  
俯仰間貧賤何必終留侯起亡虜威武赫荒夷邵平封  
東陵兮一旦為布衣枝葉托根柢死生同盛衰得志從  
命升失勢與時隕寒暑代征邁兮變化更相推禍福無  
常主何憂身無歸推茲由斯負薪又何哀

一並無兮字  
斯下有一闕

選詩拾遺  
作寄懷歌

### 大人先生歌

天地解兮六合開星辰實兮日月頽我騰而上將何懷

爾汝歌

世說新語曰晉武帝問孫皓聞南人好作爾汝歌頗能為不皓正飲酒因舉觴

勸帝曰云云帝悔之

吳孫皓

昔與汝為鄰今與汝為臣上汝一杯酒令汝壽萬春

一作

願汝壽千春


效孫皓爾汝歌

南史曰河東王歆之嘗為南康劉邕相素輕邕後歆之與邕俱

與元會並坐邕謂歆之曰卿昔見臣今能見勸一杯酒否歆之因效孫皓歌答之

宋王歆之

昔為汝作臣今與汝比肩既不勸汝酒亦不願汝年



古樂苑卷三十四

欽定四庫全書

集部

古樂苑卷三十五

詳校官編修<sub>臣</sub>李堯棟

主事銜<sub>臣</sub>徐以坤覆勘

總校官降調編修<sub>臣</sub>倉聖脉

校對官主事<sub>臣</sub>陳文樞

謄錄監生<sub>臣</sub>衛子忠

欽定四庫全書

古樂苑卷三十五

明 梅鼎祚 編

襍曲歌辭

晉

讌飲歌

晉書曰高祖伐公孫淵過溫見父老  
故舊讌飲累日悵然有感為歌曰

晉宣帝

天地開闢日月重光遭逢際會奉辭遐方將掃羣穢還  
過故鄉肅清萬里總齊八荒告成歸老待罪武陽

羣一作逋

輕薄篇

樂府解題曰輕薄篇言乘肥馬衣輕裘馳逐經過為樂與少年行同意何遜云

城東美少年張正見  
云洛陽美少年是也

晉張華

末世多輕薄，驕代好浮華。  
志意能放逸，貲財亦豐奢。  
被服極纖麗，肴膳盡柔嘉。  
僮僕餘梁肉，婢妾蹈綾羅。  
文軒樹羽蓋，乘馬鳴玉珂。  
橫簪刻玳瑁，長鞭錯象牙。  
足下金鑄履，手中雙莫邪。  
賓從煥絡繹，侍御何芬葩。  
朝與金張期，暮宿許史家。  
甲第面長街，朱門赫嵯峨。  
蒼梧竹葉清，宜城九醞醑。  
浮醪隨觴轉，素蟻自跳波。  
美女興齊趙，妍

唱出西巴一顧傾城國千金寧足多北里獻奇舞大陵  
奏名歌新聲踰激楚妙伎絕陽阿玄鶴降浮雲鰥魚躍  
中河墨翟且停車展季猶咨嗟淳于前行酒雍門坐相  
和孟公結重闕賓客不得蹉三雅來何遲耳熱眼中花  
盤按互交錯坐席咸諠譁簪珥咸墮落冠冕皆傾邪酣  
飲終日夜明燈繼朝霞絕纓尚不尤安能復顧他留連  
彌信宿此歡難可過人生若浮寄年時忽蹉跎促促朝  
露期榮樂遽幾何念此腸中悲涕下自滂沱但畏執法



吏禮防且切磋

代一作或能一作既傾城  
國一作城國傾寧一作不

同前

梁何遜

城東美少年重身輕萬億  
柘彈隨珠丸白馬黃金飾  
長安九遠上青槐蔭道植  
穀擊晨已喧肩排暝不息  
走狗通西望牽牛豆南直  
相期百戲傍去來三市側  
象牀香繡被玉盤傳綺食  
大姊掩扇歌小妹開簾織  
相看獨隱笑見人還歛色  
黃鵠悲故羣山枝詠新識  
烏飛過客盡雀聚行龍匿  
酌羽方厭厭此時歡未極

城東一作長安  
飾一作勒大姊

一作娼女  
妹一作婦

同前

陳張正見

洛陽美年少朝日正開霞細蹠連錢馬傍趨首藉花揚  
鞭還却望春色滿東家井桃映水落門柳襍風斜綿蠻  
弄青綺蛺蝶遠承華欲往飛廉館遙駐季倫車石榴傳  
馬腦蘭肴奠象牙聊持自娛樂未是關豪奢莫嫌龍馭  
晚扶桑復浴鶚

遊俠篇

漢書遊俠傳曰戰國時列國公子魏有  
信陵趙有平原齊有孟嘗楚有春申皆

藉王公之勢競為遊俠以取重諸侯顯名天下故後世稱遊俠者以四豪為首焉漢興有魯人朱家及劇孟郭解之徒馳騫於閭里皆以俠聞其後長安熾盛街閭各有豪俠時萬章在城西柳市號曰城西萬章酒市有趙君都賈子光皆長安名豪報仇怨養刺客者也魏志曰楊阿若後名豐字伯陽少遊俠常以報仇解怨為事故時人為之號曰東市相斫楊阿若西市相斫楊阿若後世遂有遊俠曲魏陳琳晉張華又有博陵王宮俠曲

晉張華

翩翩四公子濁世稱賢明龍虎相交爭七國竝抗衡食客三千餘門下多豪英遊說朝夕至辯士自從橫孟嘗

東出關濟身由雞鳴信陵西反魏秦人不窺兵趙勝南  
詛楚乃與毛遂行黃歇北適秦太子還入荆美哉遊俠  
士何以尚四卿我則異於是好古師老彭

不窺兵一作開濟彊

同前

題云遊俠一云古意  
英華作樂府姑從之

梁王僧孺

青絲控燕馬紫艾飾吳刀朝風吹錦帶落日映珠袍陸  
離關右客照耀山西豪雖非學詭遇終是任逢遭人生  
會有死得處如鴻毛寧能偶雞鶩寂寞隱蓬蒿

同前

周王褒

京洛出名謳豪俠競交遊河南期四姓關西謁五侯  
雞橫大道走馬出長楸桑陰徙將夕槐路轉淹留

同前

英華作俠客行詩  
彙併入陳子良

隋陳良

洛陽麗春色遊俠騁輕肥水逐車輪轉塵隨馬足飛  
雲影遙臨蓋花氣近薰衣東郊鬪雞罷南陂射雉歸  
日暮河橋上揚鞭惜晚暉

俠客篇

梁王筠

俠客趨名利劒氣坐相矜黃金塗鞘尾白玉飾鉤膺  
晨

馳逸廣陌日暮返平陵舉鞭向趙李與君方代興

博陵王宮俠曲 二首

晉張華

俠客樂幽險築室窮山陰獠獵野獸稀施網川無禽歲  
暮飢寒至慷慨頓足吟窮令壯士激安能懷苦心干將  
坐自佩繁弱控餘音耕田窮淵陂種粟著劒鐔收秋狹  
路間一擊重千金棲遲熊羆穴容與虎豹林身在法令  
外縱逸常不禁

雄兒任氣俠聲蓋少年場借友行報怨殺人租市旁吳



刀鳴手中利劍嚴秋霜腰間義素戟手持白頭鑲騰超  
如激電迴旋如流光奮擊當手決交屍自縱橫寧為殤  
鬼雄義不入圜墻生從命子遊死聞俠骨香身沒心不  
懲勇氣加四方

壯士篇

燕荆軻歌曰風蕭蕭兮易水寒壯士一去兮不復還壯士篇蓋出於此

晉張華

天地相震蕩回薄不知窮人物稟常格有始必有終年  
時俛仰過功名宜速崇壯士懷憤激安能守虛沖乘我

大宛馬撫我繁弱弓長劒橫九野高冠拂玄穹慷慨成  
素霓嘯吒起清風震響駭八荒奮威曜四戎濯鱗滄海  
畔馳騁大漠中獨步聖明世四海稱英雄

知一作可

遊獵篇

晉張華

歲暮凝霜結堅冰  
沍幽泉厲風蕩原隰浮雲蔽昊天  
玄雲晦翫合素雪紛連翩  
鷹隼始擊鷙虞人獻時鮮  
嚴駕鳴儔侶攬轡過中田  
戎車方四牡文軒馭紫燕  
輿徒既整飭容貌麗且妍  
武騎列重圍前驅抗脩旃  
倏忽似回



飈絡繹若浮煙鼓噪山淵動衝塵雲霧連輕縉拂素霓  
織網蔭長川遊魚未暇竄歸鴈不得還由基控繁弱公  
差操黃間機發應弦倒一縱連雙肩僵禽正狼藉落羽  
何翻翻積獲被山阜流血丹中原馳騁未及勸曜靈俄  
移晷結且彌敷澤囂聲振四鄙鳥驚觸白刃獸駭掛流  
矢仰手接遊鴻舉足蹴犀兕如黃批狡兔青骹撮飛雉  
鵠鷺不盡收鳬鷺安足視日冥徒御勞賞勤課能否野  
饗會衆賓玄酒甘且旨燔炙播遺芳金觴浮素蟻珍羞

墜歸雲纖看出淥水四氣運不停年時何疊疊人生忽  
如寄居世遽能幾至人同禍福達士等生死榮辱渾一  
門安知惡與美遊放使心狂覆車難再履伯陽為我誠  
檢跡投清軌

行行且遊獵篇

梁劉孝威

之罘講射所上林娛獵場選徒驕楚客召狩誇胡王罽  
車已成道風鳥復起行飲飛具增繳材官命蹶張高置  
掩月兔勁矢射天狼蹠地不遑逸排虛豈及翔日暮勾

陳轉風清饒吹颺歸來宴平樂寧肯滯禽荒

雲中白子高行

晉傅玄

陵陽子來明意欲作天與仙人遊超登元氣攀日月遂  
造天門將上謁閭闔闔見紫微絳闕紫宮崔嵬高殿嵯  
峨雙闕萬丈玉樹羅童女掣電策童男挽雷車雲漢隨  
天流浩浩如江河因王長公謁上皇鈞天樂作不可詳  
龍仙神仙教我靈秘八風子儀與遊我祥我心何戚戚  
思故鄉俯看故鄉二儀設張樂哉二儀日月運移地東

南傾天西北馳鶴五氣所補鼇四足所支齊駕飛龍驂  
赤螭逍遙五岳間東西馳長與天地竝復何為復何為

### 西長安行

樂府解題曰西長安行晉傅休奕云  
所思兮何在乃在西長安其下因叙

別離之意也三輔舊事曰長安城似北斗周  
地圖記曰長安城南為南斗形北為北斗形  
通典曰漢高帝自櫟陽徙都長安至惠帝  
方發人徒築城即長安西北古城是也

### 晉傅玄

所思兮何在乃在西長安何用存問妾香橙雙珠環何  
用重存問羽爵翠琅玕今我兮問君更有兮異心香亦

不可燒環亦不可沈香燒日有歇環沈日自深

前有一罇酒行

晉傅玄

置酒結此會主人起行觴玉罇兩楹間絲理東西廂舞袖一何妙變化窮萬方賓主齊德量欣欣樂未央同享千年壽朋來會此堂

同前

陳後主

殿高絲吹滿日落綺羅鮮莫論朝漏促傾卮待夕筵

同前

張正見

前有一樽酒主人行壽今日合來坐者當令皆富且壽  
欲令主人三萬歲終歲不知老為吏當高遷賈市得萬  
倍桑蠶當大得主人宜子孫

飛塵篇

晉傅玄

飛塵穢清流朝雲蔽日光秋蘭豈不芬鮑肆亂其芳河  
決潰金隄一手不能障

秋蘭篇

秋蘭本出於楚辭離騷云秋蘭兮麝蕪  
羅生兮堂下綠葉兮素華芳菲菲兮襲

予蘭香草言芳香菲菲上及於我也傅玄秋  
蘭篇云秋蘭蔭玉池池水且芳香其旨言婦

人之託君子猶秋蘭之  
蔭玉池與楚辭同意

晉傅玄

秋蘭蔭玉池池水清且芳芙蓉隨風發中有雙鴛鴦雙

魚自踴躍兩鳥時迴翔君其歷九秋與妾同衣裳

清且芳一

作且芳香  
其一作期

明月篇

藝文作怨詩  
一作朗月篇

晉傅玄

皎皎明月光灼灼朝日暉昔為春蠶絲今為秋女衣丹

唇列素齒翠彩發蛾眉嬌子多好言歡合易為姿玉顏

盛有時秀色隨年衰常恐新間舊變故興細微浮萍本

無根非水將何依憂喜更相接樂極還自悲

本無根一作無根本

明月子

陳謝燮

杪秋之遙夜明月照高樓登樓一迴望望見東陌頭故人眇千里言別歷九秋相思不相見望望空離憂

東一作南

朗月行

宋鮑照

朗月出東山照我綺牕前牕中多佳人被服妖且妍靚妝坐帷裏當戶弄清弦鬢奪衛女迅體絕飛燕先為君歌一曲當作朗月篇酒至顏自解聲和心亦宣千金何



足重所存意氣間

當作朗月篇一作堂上朗月篇

車遥遥篇

一作梁車數今從玉臺

晉傳玄

車遥遥兮馬洋洋  
追思君兮不可忘  
君安遊兮西入秦  
願為影兮隨君身  
君在陰兮影不見  
君依光兮妾所願

天行篇

晉傳玄

天行一何健  
日月無高蹤  
百川皆赴海  
三辰回泰蒙

百川

皆赴海藝文作百川赴暘谷

三光篇

初學作劉孝綽

晉傳玄

三光垂象表天地有晷度聲和音響應形立影自附素  
日抱玄鳥明月懷靈兔

吳楚歌

一曰燕人美篇按漢樂府有吳楚汝南歌詩十五篇

晉傅玄

燕人美兮趙女佳其室則邇兮限層崖雲為車兮風為  
馬玉在山兮蘭在野雲無期兮風有止思多端兮誰能

理

一作思心多端誰能理

天行歌

晉傅玄

天時泰兮照以陽清風起兮景雲翔仰觀兮辰象日月  
兮運周俯視兮河海百川兮東流

日昇歌

晉傅玄

東光昇朝陽羲和初攬轡六龍並騰驤逸景何晃晃旭  
日照萬方皇德配天地神明鑒幽荒

驚雷歌

晉傅玄

驚雷奮兮震萬里威陵宇宙兮動四海六合不維兮誰  
能理

雲歌

晉傅玄

白雲翩翩翔天庭  
流景髣髴非君形  
白雲飄飄捨我高  
翔青雲裴回為我愁腸

同前

梁王臺鄉

玉雲初度色金風  
送影來全生疑魄  
暗半去月時開欲  
知無處所一為上陽臺

蓮歌

晉傅玄

渡江南採蓮花  
芙蓉增敷暎若星  
羅綠葉映長波  
迴風

容與動纖柯

襟歌

晉傅玄

鳳有翼龍有鱗君不獨興必須良臣

歌辭

晉傅玄

雷師鳴鐘鼓風伯吹笙簧西母出穴聽王父吟東廂

昔思君

晉傅玄

昔君與我兮形影潛結今君與我兮雲飛雨絕昔君與  
我兮音響相和今君與我兮落葉去柯昔君與我兮金

石無虧今君與我今星滅光離

君子有所思行

樂府解題曰君子有所思行晉陸機云命駕登北山宋鮑照云

西上登雀臺梁沈約云晨策終南首其旨言彫室麗色不足為久惟宴安醜毒滿盈所宜

敬忌與君子行異也

晉陸機

命駕登北山延佇望城郭廛里一何盛街巷紛漠漠甲第崇高闔洞房結阿閣曲池何湛湛清川帶華薄邃宇列綺牕蘭室接羅幕淑貌色斯升哀音承顏作人生盛行邁容華隨年落善哉膏梁士營生與且博宴安消靈

根醜毒不可恪無以肉食資取笑藜與藿

藜一作藿

同前

宋謝靈運

總駕越鍾陵還顧望京畿躑躅周名都遊目倦忘歸市  
鄧無阨室世族有高闈密親麗華苑軒輦飾通達孰是  
金張樂諒由燕趙詩長夜恣酣飲窮年弄音徽盛往速  
露墜衰來疾風飛餘生不歡娛何以竟暮歸寂寥曲肱  
子瓢飲療朝飢所秉自天性貧富豈相譏

倦一作卷  
阨一作夾

同前

鮑照

西上登雀臺東下望雲闕層閣肅天居馳道直如髮繡  
薨結飛霞璇題納行月築山擬蓬壺穿池類溟渤選色  
徧齊岱徵聲匝邛越陳鍾陪夕宴笙歌待明發年貌不  
可留身意會盈歇蟻壤漏山河絲淚毀金骨噐惡含滿  
歎物忌厚生沒智哉衆多士服理辨昭晰

一作昭昧叶  
末河一作阿

同前

梁沈約

晨策終南首顧望咸陽川戚里邈層闕甲館負崇軒複  
塗希紫閣重臺擬望仙巴姬幽蘭奏鄭女陽春弦共矜



紅顏日俱忘白髮年寂寥茂陵宅照曜未央蟬無以五  
鼎盛顧咄三經玄

齊謳行

漢書曰漢王至南鄭諸將及士卒皆歌謳思東歸顏師古曰謳齊歌也謂齊聲

而歌或曰齊地之歌禮樂志曰齊古謳員六人梁元帝纂要曰齊歌曰謳是也陸機齊謳

行儔言齊地之美亦欲使人推分直進不可妄有所營也晉陸機

營丘負海曲沃野爽且平洪川控河濟崇山入高冥東  
被姑尤側南界聊攝城海物錯萬類陸產尚千名孟諸  
吞楚夢百二倖秦京惟師恢東表桓侯定周傾天道有

迭代人道無久盈鄙哉牛山歎未及至人情與鳩苟已  
徂吾子安得停行行將復去長存非所營

同前

梁沈約

東秦稱右地川隰固夷昶層峯駕蒼雲濁河流素壤青  
丘良杳鬱雪宮信䟽敞王佐改殷命霸功繆周網

闕

齊歌行

齊陸厥

黃金徒滿籬不如守章句雪宮紛多士稷下岌成覆同  
載雙連珠合席懸河注垂帷五行下操筆百金賦華屋

大車方高門駟馬驅玄豹空不食南山隱雲霧

覆一作露珠一

壁作

吳趨行

崔豹古今注曰吳趨行吳人以歌其地陸機吳趨行曰聽我歌吳趨趨步也

晉陸機

楚妃且勿歎齊娥且莫謳四坐竝清聽聽我歌吳趨吳趨自有始請從閭門起閭門何峨峨飛閣跨通波重櫓承遊極迴軒啓曲阿藹藹慶雲被泠泠鮮風過山澤多藏育土風清且嘉泰伯蕞仁風仲雍揚其波穆穆延陵

子灼灼光諸華王迹積陽九帝功興四遐大皇自富春  
矯首頓世羅邦彥應運興榮若春林葩屬城咸有士吳  
邑最為多八族未足侈四姓實名家文德熙淳懿武功  
侔山河禮讓何濟濟流化自滂沱淑美難窮紀商榷

此歌

始一作紀峨峨一作嵯峨鮮一作祥首一作手

同前

樂府不載名氏次陸機後六朝詩彙遂作機詩按此格調必非晉人姑從附入

蘭滿蓋重簾唯有遠相思藕葉清朝釧何見早歸時

歸

還作

同前

梁元帝

水裏生蔥翅池心恒欲飛蓮花逐牀返何時乘潮歸

悲哉行

歌錄曰悲哉行魏明帝造樂府解題曰陸機云遊客芳春林謝惠連云羈人感

淑節皆言客遊感物憂思而作也

晉陸機

遊客芳春林春芳傷客心和風飛清響鮮雲垂薄陰蔥  
草饒淑氣時鳥多好音翩翩鳴鳩羽喈喈倉庚吟幽蘭  
盈通谷長莠被高岑女蘿亦有託蔓葛亦有尋傷哉客  
遊士憂思一何深目感隨氣草耳悲詠時禽寤寐多遠

念緬然若飛沈願託歸風響寄言遺所欽

吟一作音

同前

陸士美集  
亦載誤

宋謝靈運

萋萋春草生王孫遊有情差池燕始飛天裊桃始榮灼  
灼桃悅色飛飛燕弄聲岩上雲結陰澗下風吹清幽樹  
雖改觀終始在初生松蔦歡蔓延樛葛欣蘩縈眇然遊  
宦子晤言時未并鼻感改朔氣眼傷變節榮侘傺豈徒  
然澶漫絕音形風來不可託鳥去豈為聽

眼一作心  
澶一作緬

同前

鮑照集  
亦載

謝惠連

羈人感淑節緣感欲回轍我行詎幾時華實驟舒結親  
實情有悲瞻華意無悅覽物懷同志如何復乖別翩翩  
翔禽羅闕闕鳴鳥列翔禽常疇偶所歎獨乖絕

翔禽一作翔鳴

同前

梁沈約

旅遊媚年春年春媚遊人徐光旦垂彩和露曉凝津時  
嚶起推葉蕙氣動初蘋一朝阻舊國萬里隔良辰

百年歌

十首

晉陸機

一十時顏如薜華曄有暉體如飄風行如飛變彼孺子

相追隨終朝出遊薄暮歸六情逸豫心無違清酒漿炙  
奈樂何清酒漿炙奈樂何

二十時膚體彩澤人理成美目淑貌灼有榮被服冠帶  
麗且清先車駿馬遊都城高談雅步何盈盈清酒漿炙  
奈樂何清酒漿炙奈樂何

三十時行成名立有令聞力可扛鼎志干雲食如漏卮  
氣如熏辭家觀國綜典文高冠素帶煥翩紛清酒漿炙  
奈樂何清酒漿炙奈樂何



四十時體力克壯志方剛跨州越郡還帝鄉出入承明  
擁大璫清酒漿炙奈樂何清酒漿炙奈樂何

五十時荷旄仗節鎮邦家鼓鐘嘈囋趙女歌羅衣綵粲  
金翠華言笑雅舞相經過清酒漿炙奈樂何清酒漿炙  
奈樂何

六十時年亦耆艾業亦隆驂駕四牡入紫宮軒冕婀娜  
翠雲中子孫昌盛家道豐清酒漿炙奈樂何清酒漿炙  
奈樂何

七十時精爽頗損膂力愆清水明鏡不欲觀臨樂對酒  
轉無歡攬形羞髮獨長歎

形一作衣  
羞一作脩

八十時明已損目聰去耳前言往行不復紀辭官致祿  
歸桑梓安車駟馬入舊里樂事告終憂事始

九十時日告耽痺月告哀形體雖是志意非言多謬誤  
心多悲子孫朝拜或問誰指景玩日慮安危感念平生  
淚交揮

百歲時盈數已登肌肉單四支百節還相患目若濁鏡

口垂涎呼吸嘖感反側難茵褥滋味不復安

女怨詩

晉皇甫謐

婚禮既定婚禮臨成施衿結帨三命丁寧

逸民吟

晉潘尼

我顧傲世自遺舒志六合由巢是追沐浴池洪迅羽衣  
陟彼名山採此芝薇朝雲霞黻行露未晞遊魚羣戲翔  
鳥雙飛逍遙博觀日晏忘歸嗟哉四士從我者誰

嬌女詩

按神弦曲有嬌女詩不知此亦同否今附入

晉左思

吾家有嬌女皎皎頗白皙小字為織素口齒自清歷鬢  
髮覆廣額雙耳似連璧明朝弄梳臺黛眉類掃跡濃朱  
行丹唇黃吻瀾漫赤嬌語若連瑣忿速乃明愷握筆利  
彤管篆刻未期益執書愛綈素誦習矜所獲其娣字惠  
芳兩目燦如畫輕粧喜樓邊臨鏡忘紡績舉觴擬京兆  
立的成復易玩弄眉頰間劇蕪機杼役從容好趙舞延  
袖像飛翮上下絃柱際文史輒卷襞顧盼屏風畫如見  
已指撚丹青日塵閣明義為隱蹟馳驚翔園林菓下皆

生摘紅葩掇紫蒂萍實驟抵擲貪華風雨中倏忽數百  
適務躡霜雪戲重綦常累積并心注肴饌端坐理盤福  
翰墨戢閑按相與數離逖動為鑪鉦屈屣履任之適止  
為茶菽據吹吁對鼎鑊脂膩漫白袖煙薰染阿錫衣被  
皆重池難與沈水碧任其孺子意羞受長者責瞥聞當  
與杖掩淚俱向壁

編作鑷茶菽

一作茶薺

重池被之心如池也玉臺作衣破皆  
重施誤織一作紈娣玉臺作姪外

思吳江歌

一曰秋風歌晉文士傳曰張翰有清  
名美望大司馬齊王同辟為東曹掾

在洛見秋風起思吳中菰飯蓴羹鱸魚膾歎  
曰人生貴得適意爾何能霸宦數千里以要  
名爵因作此  
歌遂命駕還

晉張翰

秋風起兮佳景時  
吳江水兮鱸魚肥  
三千里兮家未歸  
恨難得兮仰天悲

山路吟

晉夏侯湛

夙駕兮待明陟  
山路兮遐征  
冒晨朝兮入大谷  
道逶迤兮嵐氣清  
攬轡兮抑馬踟躕  
兮曠野曠野  
軀兮遼落崇岳兮  
崑崙邱陵兮連離  
卉木兮交錯  
淥水兮長流  
驚濤

兮拂石

江上汎歌

晉夏侯湛

悠悠兮遠征倏倏兮暨南荆南荆兮臨長江臨長江兮  
討不庭江水兮浩浩長流兮萬里洪浪兮雲轉陽侯兮  
奔起驚翼兮垂天鯨魚兮岳踣蘼蕪紛兮被臯陸脩竹  
鬱兮翳崖趾望江之南兮邀目桂林桂林翳鬱兮鷗雞  
揚音凌波兮願濟舟楫不具兮江水深沈嗟迴盼於北  
夏何歸軫之難尋

長夜謠

晉夏侯湛

日暮兮初晴天灼灼兮遐清披雲兮歸山垂景兮照庭  
列宿兮皎皎星稀兮月明亭檐隅以逍遙兮盼太虛以  
仰觀望閭闔之昭晰兮麗紫微之暉煥

寒苦謠

晉夏侯湛

惟立冬之初夜天慘慄以降寒霜皚皚以被庭冰澹瀨  
於井幹草槭槭以疏葉木蕭蕭以零殘松隕葉於翠條  
竹摧柯於綠竿



扶風歌

九解

晉劉琨

朝發廣莫門暮宿丹水山左手彎繁弱右手揮龍淵  
顧瞻望宮闕俯仰御飛軒據鞍長歎息淚下如流泉  
繫馬長松下發鞍高嶽頭冽冽悲風起泠泠澗水流  
揮手長相謝哽咽不能言浮雲為我結飛鳥為我旋  
去家日已遠安知存與亡慷慨窮林中抱膝獨摧藏  
麋鹿遊我前猿猴戲我側資糧既乏盡薇蕨安可食  
攬轡命徒侶吟嘯絕巖中君子道微矣夫子故有窮

惟昔李愬期寄在匈奴庭忠信反獲罪漢武不見明  
我欲竟此曲此曲悲且長棄置勿重陳重陳令心傷

同前

宋鮑照

昨辭金華殿今次鴈門縣寢臥握秦戈棲息抱越箭忍  
悲別親知行泣隨征傳寒煙空裊徊朝日乍舒卷

同前

見太平御覽按北史常景傳曰景嘗因出塞經歷山水悵然懷古乃擬劉琨扶風歌

十二首此或  
其遺句耶

無名氏

南山名崑崙松柏何摧摧上枝拂青雲中心大數圍

合歡詩

五首樂府解題曰合歡詩晉楊方所作也言婦人謂虎嘯風起龍躍雲浮磁石

引針陽燧改火皆以同聲相應同氣相求我與君情亦猶形影宮商之不離也常願食共同根穗飲共連理杯衣共雙絲絹寢共無縫綢坐必接膝行必攜手如鳥同翼如魚比目利斷金石密踰膠漆也後三首玉臺題云褊詩郭氏併作合歡詩今按意義實與合歡無涉姑仍舊錄

晉楊方

虎嘯谷風起龍躍景雲浮同聲好相應同氣自相求我情與子親譬如影追軀食共同根穗飲共連理杯衣共雙絲絹寢共無縫綢居願接膝坐行願攜手趨子靜我

不動子遊我不留齊彼同心鳥譬此比目魚情至斷金石膠漆未為牢但願長無別合形作一軀生為併身物死為同棺灰秦氏自言至我情不可儔

同一作並  
此一作彼

磁石引長鍼陽燄下炎煙宮商聲相和心同自相親我情與子合亦如影追身寢共織成被絮共同功綿暑拙比翼扇寒坐併肩氈子笑我必哂子蹴我無歡來與子共迹去與子同塵齊彼蛩蛩獸舉動不相捐唯願長無別合形作一身生有同室好死成併棺民徐氏自言至

我情不可陳

獨坐空室中愁有數千端悲響答愁歎哀涕應苦言  
彷徨四顧望白日入西山不覩佳人來但見飛鳥還

飛鳥亦何樂夕宿自作羣

言一作心

飛黃銜長泰翼翼回輕輪俯涉淶水澗仰過九層山  
脩途曲且險秋草生兩邊黃華如沓金白花如散銀  
青敷羅翠采絳葩象赤雲爰有承露枝紫榮合素芬  
扶疎重清藻布翹芳且鮮目為豔采回心為奇色旋

撫心悼孤客俯仰還自憐踟躕向壁歎攬筆作此文  
南鄰有奇樹承春挺素華豐翹被長條綠葉蔽朱柯  
因風吹微音芳氣入紫霞我心羨此木願徙著予家  
夕得遊其下朝得弄其葩爾根深且堅予宅淺且滲  
移植良無期歎息將如何

鄰玉臺作  
林堅作固

### 大道曲

樂府解題曰謝尚為鎮西將軍常著紫羅襦據胡牀在市中佛國門樓上彈琵琶作大道曲市人不知足三公也

晉謝尚

青陽二三月柳青桃復紅車馬不相識音落黃埃中

懷歸謠

晉湛方生

辭衡門兮至歡懷生離兮苦辛豈羈旅兮一慨亦代謝  
兮感人四運兮道盡化新兮歲故氛慘慘兮凝晨風悽  
悽兮薄暮雨雪兮交紛重雲兮四布天地兮一色六合  
兮同素山木兮摧披津壑兮凝沍感羈旅兮苦心懷桑  
梓兮增慕胡馬兮戀北越鳥兮依陽彼禽獸兮尚然况  
君子兮去故鄉望歸塗兮漫漫盼江流兮洋洋思涉路  
兮莫由欲越津兮無梁

曲池歌

拾遺在湛方生後詩品作湛詩謝朓有曲池之水未詳與此同否

曲池何澹澹芙蓉蔽清源榮華盛壯時見者誰不歡一朝光采落見者不迴顏

曲池水

集云曲池之水

齊謝朓

緩步遵莓渚披衿待蕙風芙蓉舞輕蒂苞笋出芳叢浮雲自西北江海思無窮鳥去能傳響見我綠琴中

綠一作測

出歌

晉孫楚

茱萸出芳樹顛鯉魚出洛水泉白鹽出河東美豉出魯



川薑桂茶芽出巴蜀椒橘木蘭出高山蓼蘇出溝渠

稗出中田

闕

別歌

晉書曰錢鳳為王敦鎧曹叅軍知敦有不臣之心相與朋構專弄威權叅軍熊甫諫

敦不聽遂告歸臨別歌曰

晉熊甫

徂風颭起蓋山陵氛霧蔽日玉后焚往事既去可長歎

念別惆悵復會難

歌

一首高僧傳曰外國名僧佉叱寄名長干寺有張奴者不知何許人不甚見食而常自肥

澤冬夏常著單布衣佉叱行見張奴欣然而笑佉叱曰吾東見蔡純南訊馬生北遇王年

今欲就杯度乃與子相見  
耶張奴乃題槐樹歌曰

張奴

濛濛大象內照耀實顯彰何事迷昏子縱惑自招殃樂  
所少人往苦道若翻囊不有松柏志何用擬風霜聞豫  
紫煙表長歌出吳蒼澄虛無色外應見有緣鄉歲曜毗  
漢后麗辰傳殷王伊余非二仙晦迹之九方亦見流俗  
子觸眼致酸傷略謠觀有念寧曰盡矜章

酒德歌

前秦紀秦王堅與羣臣  
飲以極醉為限整作歌

前秦趙整

地列酒泉天垂酒池杜康妙識儀狄先知紂喪殷邦桀

傾夏國由此言之前危後則

又

崔鴻十六國春秋前秦錄曰苻堅宴羣臣於釣臺秘書侍郎趙整以堅頗好酒因為酒德

之歌

獲黍西秦採麥東齊春封夏發鼻納心迷

載太平御覽未全

諫歌

前秦紀 晉孝武帝寧康二年冬十二月秦王堅與慕容垂夫人段氏同輦遊於後

庭宦官趙整歌曰云云堅改容謝之命夫人下輦

前秦趙整

不見雀來入鷺室但見浮雲蔽白日

古樂苑卷三十五